

四庫全書

集部

欽定四庫全書

集部

文忠集卷二

詳校官庶吉士臣范逢恩

檢討臣何恩鈞覆勘

總校官降調編修臣倉聖脉

校對官檢討臣錢世錫

謄錄監生臣王尚珏

御製讀歐陽修縱囚論

自天子以至於庶人壹是皆以修身為本修身若何忠孝而已矣唐太宗要父以叛君殺兄以逼父忠孝之道泯矣自知無以取譽於後世故即位之後於凡好名之事無所不為人之言曰三代以下惟恐不好名此雖矯枉之論然在人臣或猶可而在人君則斷斷不可蓋名者實之末而君者臣之率天下之情偽萬變而總不出於為名為上者竭誠以感下猶懼弗當而顧先率以從

其未幾何其不喪其實而失為君子之道哉太宗好名
之事不一而足向於樂善堂集曾論及之而莫過於縱
囚之特甚歐陽修作縱囚論而評之曰安知夫縱之去
也不意其必來以冀免所以縱之乎又安知夫被縱而
去也不意其自歸而必獲免所以復來乎是上下交相
賊以成此名烏有所謂施恩德與夫知信義哉太宗設
詐沽譽此數語足以抉其隱微矣既又斷之曰縱而來
歸殺之無赦而又縱之而又來則可知為恩德之致修

之此語蓋以聞太宗之為詐耳而未免失之以辭害義
蓋縱而來歸殺之無赦則再縱者豈肯復來乎是略託
於存信義者被殺而怙終不悛者反得生有是理乎雖
然三百人衆矣豈皆能為君子之所難而無一二求倖
免者太宗多術人也意彼時必有以密示司理期三百
人以必來而必免苟其不來必大索天下而誅之且及
其父母妻子夫三百人者原在此域中也其敢不來以
冀倖免而不來以累及其父母妻子乎史官無識未求

其詳而載之反以為盛德之感有識者觀之實不值一
喙之兒戲耳而歐氏猶以為可偶一為之予以為即偶
一為之亦不可

欽定四庫全書

集部三

文忠集

別集類二宋

提要

臣等謹案文忠集一百五十三卷附錄五卷
宋歐陽修撰修有詩本義已著錄案宋史藝
文志載修所著文集五十卷別集二十卷六
一集七卷奏議十八卷內外制集十一卷從
諫集八卷諸集之中惟居士集為修晚年所

自編其餘皆出後人裒輯各自流傳如衢州刻奏議韶州刻從諫集浙西刻四六集之類又有廬陵本京師舊本綿州本宣和吉本蘇州本閩本諸名分合不一陳振孫書錄解題謂修集遍行海內而無善本蓋以是也此本為周必大所編定自居士集至書簡集凡分十種前有必大所作序陳振孫以為益公解相印歸用諸本編校刊之家塾其子綸又以

所得歐陽氏傳家本歐陽棐所編次者屬益
公舊客曾三異校正益完善無遺恨然必大
原序又稱郡人孫謙益承直郎丁朝佐徧搜
舊本與鄉貢進士曾三異等互相編校起紹
熙辛亥迄慶元庚辰据此則是書非三異獨
校亦非必大自輯與振孫所言俱不合檢書
中舊存編校人名姓有題紹熙三年十月丁
朝佐編次孫謙益校正者有題紹熙五年十

月孫謙益王伯芻校正者又有題郡人羅泌
校正者亦無曾三異之名惟卷末考異中多
有云公家定本作某者似即周綸所得之歐
陽氏本疑此書編次義例本出必大特意存
讓善故序中不自居其名而振孫所云綸得
歐陽氏本付三異校正者乃在朝佐等校定
之後添入刊行故序亦未之及歟其書以諸
本參校同異見於所紀者曰文纂曰薛齊誼

編年慶曆文粹曰熙寧時文曰文海曰文藪
曰京本英辭類藁曰緘啟新範曰仕塗必用
曰京師名賢簡啟皆廣為蒐討一字一句必
加考覈又有兩本重見而刪其複出者如濮
王典禮奏之類有他本所無而旁採附入者
如詩解統序之類有別本所載而據理不取
者如錢鏐等傳之類其鑒別亦最為詳允觀
樓鑰攻媿集有濮議跋稱廬陵所刊文忠集

列于一百二十卷以後首尾俱同又第四卷
劄子注云是歲十月撰不曾進呈檢勘所云
即指此本以鑰之博洽而必引以為據則其
編定精密亦槩可見矣乾隆四十六年十月
恭校上

總纂官臣紀昀臣陸錫熊臣孫士毅

總校官臣陸費墀

文忠集原序

夫言有大而非夸達者信之衆人疑焉孔子曰天之將喪斯文也後死者不得與於斯文也孟子曰禹抑洪水孔子作春秋而予距楊墨蓋以是配禹也文章之得喪何與於天而禹之功與天地竝孔子孟子以空言配之不已夸乎自春秋作而亂臣賊子懼孟子之言行而楊墨之道廢天下以為是

二字一作是為

固然而不知其功孟子

既沒有申商韓非之學違道而趣利殘民以厚主其說

至陋也而士以是罔其上上之人僥倖一切之功靡然從之而世無大人先生如孔子孟子者推其本末權其禍福之輕重以救其惑故其學遂行秦以是喪天下陵夷至於勝廣劉項之禍死者十八九天下蕭然洪水之患蓋不至此也方秦之未得志也使復有一孟子則申韓為空言作於其心害於其事作於其事害於其政者必不至若是烈也使楊墨得志於天下其禍豈滅於申韓哉由此言之雖以孟子配禹可也太史公曰蓋公言

黃老賈誼晁錯明申韓錯不足道也而誼亦為之予以
是知邪說之移人雖豪傑之士有不免者况衆人乎自
漢以來道術不出於孔氏而亂天下者多矣晉以老莊
亡梁以佛亡莫或正之五百餘年而後得韓愈學者以
愈配孟子蓋庶幾焉愈之後三百有餘年而後得歐陽
子其學推韓愈孟子以達於孔子著禮樂仁義之實以
合於大道其言簡而明信而通引物連類折之於至理
以服人心故天下翕然師尊之自歐陽子之存世之不

說者譁而攻之能折困其身而不能屈其言士無賢不肖不謀而同曰歐陽子今之韓愈也宋興七十餘年民不知兵富而教之至天聖景祐極矣而斯文終有愧於古士亦因陋守舊論卑而氣弱自歐陽子出天下爭自濯磨以通經學古為高以救時行道為賢以犯顏納說為忠長育成就至嘉祐末號稱多士歐陽子之功為多嗚呼此豈人力也哉非天其孰能使之歐陽子沒十有餘年士始為新學以佛老之似亂周孔之實識者憂之

賴天子明聖詔修取士法風厲學者專治孔氏黜異端
然後風俗一變考論師友淵源所自復知誦習歐陽子
之書予得其詩文七百六十六篇於其子棐乃次而論
之曰歐陽子論大道似韓愈論事似陸贄記事似司馬
遷詩賦似李白此非予言也天下之言也歐陽子諱修
字永叔既老自謂六一居士云元祐六年六月十五日
叙綿本作三門人翰林學士承旨左朝奉郎知制誥兼
侍讀蘇軾撰

歐陽文忠公集自汴京江浙閩蜀皆有之前輩嘗言公
作文揭之壁間朝夕改定今觀手寫秋聲賦凡數本劉
原父手帖亦至再三而用字往往不同故別本尤多後
世傳錄既廣又或以意輕改殆至訛謬不可讀廬陵所
刊抑又甚焉卷帙叢勝略無統紀私竊病之久欲訂正
而患寡陋未能也會郡人孫謙益老於儒學刻意斯文
承直郎丁朝佐博覽羣書尤長考證於是徧搜舊本傍
采先賢文集與鄉貢進士曾三異等互加編校起紹熙

辛亥春迄慶元丙辰夏成一百五十三卷別為附錄五卷可繕寫模印惟居士集經公決擇篇目素定而參校衆本有增損其辭至百字者有移易後章為前章者皆已附注其下如正統論吉州學記瀧岡阡表又迥然不同則收真外集自餘去取因革粗有據依或不必存而存之各為之說列於卷末以釋後人之惑第首尾浩博隨得隨刻歲月差互標注抵牾所不能免其視舊本則有間矣既以補鄉邦之闕亦使學者據舊鑒新思公所

以增損移易則雖與公生不同時殆將如升堂避席親承指授或因是稍悟為文之法此區區本意也六月己巳前進士周必大謹書

金尺四庫全書

原序

四朝國史本傳

淳熙間進

歐陽修字永叔吉州廬陵人四歲而孤母鄭氏親誨
之學及冠嶷然有聲宋興且百年而文章體裁猶
仍五季餘習鏤刻駢偶澆忍弗振士因陋守舊論卑
氣弱蘇舜元舜欽柳開穆修輩咸有意作而張之
而力不足韓愈遺藁閱於世學者不復道修游隨
得於廢書簾中讀而心慕焉晝停食夜忘寐苦志探
蹟必欲并轡絕馳而追與之竝舉進士試南宮第一

擢甲科調西京推官留守錢惟演罷其材不撓以
吏事修以故得盡力於學入朝為館閣校勘范仲
淹以言時事貶在廷多論救司諫高若訥獨以為當
黜修詒書責之謂不知世間有羞恥事若訥上其書
坐貶夷陵令稍徙乾德令武城節度判官仲淹使
陝西辟掌書記修笑而辭曰昔者之舉豈以為
利哉同其退不同其進可也久之復校勘進集賢校
理慶歷三年知諫院時仁宗更用大臣杜衍富弼韓琦

仲淹皆在位增諫官員修首在選中每進見勸帝延問
執政咨所宜行既多所張弛小人翕翕不便修慮善人
必不勝數為帝分別言之又上朋黨論其略以為小人
無朋惟君子則有之小人所好者利祿所貪者財貨當
同利之時暫相黨引及見利而爭先則反相賊害雖兄
弟親戚不能相保故曰小人無朋君子則不然所守者
道義所行者忠信所惜者名節以之修身則同道而相
益以之事國則同心而共濟終始如一故曰君子有朋

紂有臣億萬惟億萬心可謂無朋矣而紂用以亡武王有臣三千惟一心可謂大朋矣而周用以興蓋君子之朋雖多而不厭故也修天性疾惡論事無所回隱人視之如仇而愈奮勵不顧帝獨獎其敢言面賜五品服顧侍臣曰如歐陽修者何處得來同修起居注遂知制誥故事必試而後命詔特除之奉使河東自西方用兵議者欲廢麟州以省餽餉修曰麟州天險不可廢廢之則河內郡縣民皆不安居矣不若分其兵駐並河諸堡緩

急得以應援而平時可省轉輸於策為便由是州得存
又言忻代岢嵐多禁地廢田願令民得耕之不然將為
虜有朝廷下其議久乃行歲得粟數百萬斛使還會保
州兵亂以為龍圖閣直學士河北都轉運使陞辭帝曰
勿為久留計有所欲言言之對曰臣在諫職得論事今
越職而言罪也帝曰但言之毋以中外為間賊平大將
李昭亮通判馮博文私納婦女修捕博文繫獄昭亮懼
立出之兵之始亂也招以不死既而皆殺之脅從二千

人分隸諸郡富弼為宣撫使恐後生變將使同日誅之與修遇於內黃夜半屏人告之故修曰禍莫大於殺已降况脅從乎既非朝命脫一郡不從為變不細弼悟而止杜衍等相繼罷去修上疏曰此四人者天下皆知其有可用之賢而不聞其有可罷之罪小人欲廣陷良善必指為朋黨欲動搖大臣必誣以顛權蓋善人少過唯指以為黨則可一時盡逐今四人一旦罷去臣為朝廷惜之於是邪黨益忌修因其孤甥張氏獄傳致以罪左

遷知制誥知滁州居二年徙揚州潁州復學士召判流
內銓時在外十一年矣帝見其髮白問勞甚至又有詐
為修奏乞汰內侍為姦利者其羣皆怨怒譖之出知同
州帝納吳充言而止遷翰林學士於是富弼韓琦復用
慶厯故臣稍集士大夫知天子有致治之意相賀於朝
修乞蔡州去帝復納劉敞趙抃之言而止奉使契丹其
主命貴臣四人押燕曰此非常制以卿名重故爾知嘉
祐二年貢舉時士子尚為險怪竒澁之文號太學體修

痛排抑之凡如是者輒黜畢事向之囂薄者伺修出聚
謀於馬首街邏不能制然場屋之習從是遂變加龍圖
閣學士知開封府承包拯威嚴之後簡易循理不求赫
赫名京師亦治旬月改羣牧使在翰林八年知無不言
河決商胡北京留守賈昌朝欲開橫壠故道回河使東
有李仲昌者欲導入六塔河議者莫知所從修以為河
水重濁理無不淤下流既淤上流必決以近事驗之決
河非不能力塞故道非不能力復但勢不能久耳橫壠

功大難成雖成將復決六塔狹小而以全河注之濱隸
德博必被其害不若因水所趨增隄峻防疏其下流縱
使入海此數十年之利也宰相陳執中主昌朝文彥博
主仲昌竟為河北患狄青為樞密使有威名帝不豫訛
言籍籍修請出之於外以保其終嘉祐元年水災修上
疏曰陛下臨御三紀而儲宮未建昔漢文帝初即位以
羣臣之言即立太子而享國長久為漢太宗唐明宗惡
人言儲嗣事不肯早定致秦王之亂宗社遂覆陛下何

疑而久不定乎其後建立英宗蓋原於此五年拜樞密副使六年參知政事英宗未親政皇太后御簾大臣奏事間有未可修必力抗是非臺諫官至政事堂所論或矯異他執政未及言已面折其短朝士建白利害及凡所求請必明告之曰某事可行某事不可行以是怨誹益衆帝將追崇濮王命有司訂義皆謂當稱皇伯改封大國修引喪服記以為為人後者為其父母服降三年為期而不沒其父母之名以見服可降而名不可沒也

若本生之親改稱皇伯歷考前世皆無典據進封大國則又禮無加爵之道故中書之議不與衆同太后出手書許帝稱親尊王為皇王夫人為后帝不敢當於是御史呂誨等六人爭論不已指修為主議皆被逐惟蔣之奇之說合修意修薦為御史衆目為姦邪之奇患之則思所以自解修婦弟薛宗孺有憾於修造帷薄不根之謗摧辱之展轉達於中丞彭思永思永以告之奇之奇即上章劾修神宗初即位欲深譴修訪於故宮臣孫思

恭思恭為辨釋修杜門請推治帝使詰思永之奇問所
從來辭窮皆坐黜修亦罷為觀文殿學士知亳州明年
移青州改宣徽南院使判太原府辭不拜徙蔡州修本
以風節自持既數困汙巖纔年六十即連乞謝事帝輒
優詔弗許及守青又以擅止散青苗錢為王安石所詆
故求歸愈切熙寧四年以太子少師致仕五年薨年六
十六贈太子太師謚曰文忠修始在滁州號醉翁晚更
號六一居士天資剛勁見義勇為雖機穽在前觸發之

不顧放逐流離至于再三志氣自若不悔也為文天材
自然豐約中度其學推韓愈孟軻以達於孔氏著禮樂
仁義之實以合於大道其言簡而明信而通引物連類
折之於至理以服人心超然獨騫衆莫能及故天下翕
然師尊之獎引後進如恐不及賞識之下率為聞人曾
鞏王安石蘇洵子軾轍布衣屏處未為人知修即游
其聲譽謂必顯於世篤於朋友生則振掖之死則調護
其家好古嗜學凡周漢以降金石遺文斷篇殘簡一切

撮拾研稽異同立說於左的可表證謂之集古錄奉
詔修唐書紀志表自撰五代史記法嚴詞約多取春秋
遺旨殆與史漢相上下蘇軾敘其文曰論大道似韓愈
論事似陸贄記事似司馬遷詩賦似李白識者以為名
言中子棐棐字叔弼廣覽彊記能文詞年十三時見修
著鳴蟬賦侍於側不去修撫之曰兒異時必能為此因
書以遺之用廕為祕書省正字登進士乙科念父老不
肯仕強之乃調陳州判官終不行修所為文須人代者

多出其手修薨代草遺表神宗讀而愛之意修自作也
免喪始為審官主簿官制局檢詳官太常博士主客考
功員外郎議者患選人員多請令二十五歲而試於銓
又守選三年而後仕進士特奏名者予之官而不使調
選棐曰是非朝廷所以立議本意也且所為議冗官者
欲利士人耳今加年而使守選是反害之也所謂特奏
名者非他儒人老於場屋者也閱其無成而老故予之
微官使霑祿而後歸今乃授之虛名是終窮之也遂得

不變元祐初以集賢校理為著作郎判登聞鼓院復徙
職方禮部員外郎知襄州魯布執政其弟兄魏泰恃聲
勢來居襄規占公私田園強市買與民爭利郡縣莫敢
誰何至是指州門東偏官邸廢址為天荒而請之吏具
成牘至斐曰孰謂州門之東偏而有天荒乎卻之衆共
白曰泰橫於漢南久今求地而緩與之且不可而又可
卻邪斐竟持不與泰怒譖於布徙之潞州旋又罷去奪
校理元符末還朝歷吏部右司二郎中以直祕閣知蔡

州蔡地薄賦重轉運使又為覆折之令多取於民民不堪命會有詔禁止而佐吏憚使者不敢以詔旨從事裴曰州郡之於民詔令苟有未便猶將建請今天子德意深厚知覆折之病民手詔止之若有憚而不行何以為長吏命即日行之未幾坐黨籍廢十餘年卒年六十七史臣曰由三代以降薄乎秦漢文章雖與時盛衰而藹如其言曠如其光皦如其音蓋均有先王之遺烈涉晉魏而弊至唐韓愈氏乃復起唐之文涉五季而弊至修

復起闕百川之頽波導之東注斯文正傳追步前古匹夫而為百世師一言而為天下法此兩人足以當之愈不極於用修用矣而不極其至然國朝文風彬彬至今修之功學士大夫相與尸而祝之可也

文忠集本傳

文忠集年譜

真宗景德四年丁未

是歲皇考崇國公觀為綿州軍事推官六月二十

一日寅時公生

大中祥符元年戊申

大中祥符二年己酉

大中祥符三年庚戌

是歲崇公終於泰州軍事判官公叔父暉時

任隨州推官因卜居焉公母夫人鄭氏年方二十九攜公往依之遂家于隨貧無資以荻畫地教公書字稍長多誦古人篇章使學為詩叔父後歷閬州推官江陵府掌書記仕至二千石終都官員外郎

大中祥符四年辛亥

是歲葬崇公于吉州吉水縣瀧岡

其後至和元年析吉水縣之報

恩鎮置永豐縣遂隸永豐

大中祥符五年壬子

大中祥符六年癸丑

大中祥符七年甲寅

大中祥符八年乙卯

大中祥符九年丙辰

公年十歲在隨家益貧借書抄誦州南大姓李氏子
好學公多遊其家於故書中得唐韓昌黎文六卷乞
以歸讀而愛之為詩賦下筆如成人都官曰奇童也

它日必有重名

天禧元年丁巳

天禧二年戊午

天禧三年己未

天禧四年庚申

天禧五年辛酉

乾興元年壬戌

二月仁宗即位

仁宗天聖元年癸亥

是歲公應舉隨州試左氏失之誣論其略云石言于
晉神降于莘內虵鬪而外虵傷新鬼大而故鬼小人
已傳誦坐賦逸官韻黜

天聖二年甲子

天聖三年乙丑

天聖四年丙寅

公年二十自隨州薦名禮部

天聖五年丁卯

是春試禮部不中

天聖六年戊辰公年二十二

是歲公攜文謁胥學士偃於漢陽胥公大奇之留置
門下冬攜公泛江如京師

天聖七年己巳公年二十三

是春公從胥在京師試國子監為第一補廣文館生
秋赴國學解試又第一

天聖八年庚午公年二十四

正月試禮部翰林學士晏公殊知貢舉公復為第一
三月御試崇政殿公甲科第十四名五月授將仕郎
試秘書省校書郎充西京留守推官

天聖九年辛未公年二十五

三月公至西京錢文僖公惟演為留守幕府多名士
與尹洙師魯梅堯臣聖俞尤善日為古文歌詩遂以
文章名冠天下初胥公許以女妻公是歲親迎于東

武

明道元年壬申公年二十六

是春及秋兩遊嵩嶽秋盡從通判謝絳奉御香告廟

也禮畢同遊五人皆見峭壁大書神清之洞

詳見附錄後謝

希深與梅聖俞書

公又嘗行縣視旱蝗

明道二年癸酉公年二十七

正月以吏事如京師因省叔父于漢東三月還洛夫人胥氏卒時生子未踰月九月莊獻劉后莊懿李后

祔葬定陵公至鞏縣陪祭十二月進階承奉郎

景祐元年甲戌公年二十八

三月西京秩滿歸襄城五月如京師會前留守王文
康公暘入樞府薦召試學士院閏六月乙酉授宣德
郎試大理評事兼監察御史充鎮南軍節度掌書記
館閣校勘三館秘閣所藏書多脫謬七月甲辰詔委
官編定做開元四部著為總目公預焉是歲再娶諫
議大夫楊公大雅女

景祐二年乙亥公年二十九

是歲七月公同產妹之夫張龜正死於襄城謁告視之九月夫人楊氏卒

景祐三年丙子公年三十

是歲天章閣待制權知開封府范仲淹言事忤宰相落職知饒州公切責司諫高若訥若訥以其書聞五月戊戌降為峽州夷陵縣令公自京師沿汴絕淮沂江奉母夫人赴貶所十月至夷陵

景祐四年丁丑公年三十一

三月謁告至許昌娶薛簡肅公奎女是夏叔父都官
卒九月還夷陵十二月壬辰移光化軍乾德縣令

寶元元年戊寅

十一月
改元

三月赴乾德是歲胥夫人所生子天

寶元二年己卯公年三十三

二月知制誥謝希深絳出守鄧州梅聖俞將宰襄城
與希深偕行五月公謁告往會留旬日而還六月甲

申復舊官權武成軍節度判官廳公事公自乾德奉
母夫人特次於南陽冬暫如襄城

康定元年庚辰

二月改元

公年三十四

是春赴滑州時范文正公起為陝西經略招討安撫
使辟公掌書記辭不就六月辛亥召還復充館閣校
勘仍修崇文總目十月轉太子中允癸巳同修禮書
是歲子發生

慶厯元年辛巳公年三十五

五月庚戌權同知太常禮院以見修崇文總目辭許
之八月乙酉許州對公事回依舊供職十一月丙寅
祀南郊攝太常博士引終獻十二月加騎都尉己丑
崇文總目成改集賢校理

慶歷二年壬午公年三十六

正月丁巳考試別頭舉人三月丙辰御試進士應天
以實不以文賦公擬進一首賜勅書獎諭四月丙子
復差同知禮院契丹遣汎使求關南地宰相呂夷簡

薦富弼報聘人皆危之公上書引顏真卿使李希烈事乞留弼不報五月復應詔上書極陳弊事八月請外九月通判滑州十月至州

慶歷三年癸未公年三十七

是歲仁宗廣言路修政事人多薦公宜為臺諫三月召還癸巳轉太常丞知諫院四月至京九月戊辰賜緋衣銀魚己巳同詳定國朝勲臣名次丙戌同修三朝典故十月戊申擢同修起居注十二月己亥召試

知制誥公辭辛丑有旨不試直以右正言知制誥仍
供諫職丁未同詳定編勅是月立春祭西太一宮為
獻官循例賜紫章服

慶曆四年甲申公年三十八

三月庚午兼判登聞檢院四月乙未押伴契丹賀生
辰使人御筵於都亭驛己亥命公使河東計度廢麟
州及盜鑄鐵錢并礬課虧額利害七月還京師八月
甲午保州軍叛契丹聲言討西夏癸卯除公龍圖閣

直學士河北都轉運按察使九月三朝典故成書以
公嘗預編纂賜詔獎諭十一月南郊恩進階朝散大
夫封信都縣開國子食邑五百戶

慶曆五年乙酉公年三十九

是春真定帥田況移秦州公權府事者三月時二府
杜正獻范文正韓忠獻富文忠公以黨論相繼去公
上書辨之小人素已憾公會公孤甥張氏犯法諫官
錢明逸因以財產事及公下開封鞠治府尹楊日嚴

觀望傳會上命戶部判官蘇安世入內供奉官王昭
明監勘得無他八月甲戌猶落龍圖閣直學士罷都
轉運按察使降知制誥知滁州十月甲戌至郡是歲
子奕生

慶曆六年丙戌公年四十

公在滁自號醉翁

慶曆七年丁亥公年四十一

十二月以南郊恩加上騎都尉進封開國伯加食邑

合...
三百戶是歲子槩生

年譜

慶歷八年戊子公年四十二

閏正月乙卯轉起居舍人依舊知制誥徙知揚州二
月庚寅至郡

皇祐元年己丑公年四十三

正月丙午移知潁州二月丙子至郡樂西湖之勝將
卜居焉四月丙戌轉禮部郎中八月辛未復龍圖閣
直學士是歲子辯生

皇祐二年庚寅公年四十四

七月丙戌改知應天府兼南京留守司事己酉至府
十月己未明堂覃恩轉吏部郎中加輕車都尉是歲
約梅聖俞買田於潁

皇祐三年辛卯公年四十五

皇祐四年壬辰公年四十六

三月壬戌丁母夫人憂歸潁州四月起復舊官公固
辭八月許之

皇祐五年癸巳公年四十七

八月自潁州護母喪歸葬吉州之瀧岡胥楊二夫人
祔焉是冬復至潁

至和元年甲午

三月
改元

公年四十八

五月服闋除舊官職赴闕六月癸巳朝京師乞郡不
許七月甲戌權判流內銓會小人詐為公奏請汰內
侍其徒怨怒以胡宗堯不當改官事中公戊子出知
同州判吏部南曹吳充為公辨明不報知諫院范鎮

一再極言而叅知政事劉沆方提舉修唐書亦乞留
公修書八月丙午沆拜相戊申詔公修唐書九月辛
酉遷翰林學士壬戌兼史館修撰又差勾當三班院
十月乙巳朝饗景靈宮天興殿攝侍中捧盤取水十
二月庚戌臘饗孝惠孝章淑德章懷皇后廟攝太尉
行事

至和二年乙未公年四十九

三月同孫抃考試諸司寺監人吏六月己丑上書論

宰相陳執中已而乞外改翰林侍讀學士集賢殿修
撰出知蔡州侍御史趙抃知制誥劉敞上疏留公七
月戊午復領舊職八月辛丑假右諫議大夫充賀契
丹國母生辰使將持送仁宗御容會北主殂癸丑改
充賀登位國信使十二月庚戌宿北界松山

嘉祐元年丙申

九月改元公年五十

二月甲辰使還進北使語錄閏三月丁亥判太常寺
兼禮儀事孟夏薦饗攝太尉行事五月癸未知通進

銀臺司兼門下封駁事乙未免勾當三班院六月甲子奉勅祈晴醴泉觀八月壬戌知益州張方平除三司使甲子詔公權發遣三司公事以俟其至而命李淑代知銀臺司乙亥車駕詣景靈宮朝拜天興殿充贊導禮儀使又朝謁真宗及章懿太后神御殿攝太常卿九月辛卯大慶殿行恭謝禮為贊引太常卿禮成加上輕車都尉進封樂安郡開國侯加食邑五百戶十二月被差押伴契丹賀正旦人使御筵於都亭

驛

嘉祐二年丁酉公年五十一

正月癸未權知禮部貢舉賜御書文儒二字乙巳磨
勘轉右諫議大夫三月癸卯為狄青發哀苑中攝太
常卿六月丙寅福康公主進封充國公主七月壬午
命公攝禮部侍郎以印授冊使乙未兼判尚書禮部
九月己卯兼判秘閣秘書省十一月辛巳權判史館
丙申權知審刑院候胡宿回依舊辛丑免十二月辛

亥權判三班院癸亥權奉安明德元德章穆三后御
容於啓聖院車駕行酌獻禮充禮儀使是月被差押
伴契丹賀正旦人使御筵于都亭驛

嘉祐三年戊戌公年五十二

正月壬午上幸興國寺及啓聖院朝謁太祖太宗神
御殿攝太常卿二月癸卯契丹遣使告其國母哀差
公館伴三月辛未兼侍讀學士以員多固辭不拜癸
未充宗正寺同修玉牒官甲午同陳旭考試在京百

年譜
司等人六月庚戌加龍圖閣學士權知開封府

嘉祐四年己亥公年五十三

二月戊辰免開封轉給事中同提舉在京諸司庫務
是月充御試進士詳定官賜御書善經二字四月丁
卯奏告今冬太廟親行禋饗之禮癸酉孟夏薦饗並
攝太尉行事丙子兼充羣牧使六月甲申刪定景祐
廣樂記九月丁酉奉勅祈晴相國寺十月壬申車駕
朝饗景靈宮癸酉禘饗太廟並攝侍中行事丁丑加

護軍食實封三百戶

嘉祐五年庚子公年五十四

四月丁卯孟夏薦饗太廟攝太尉行事七月戊戌上
新修唐書二百五十卷庚子推賞轉禮部侍郎九月
丁亥兼翰林侍讀學士十月庚午下元節車駕朝拜
景靈宮天興殿朝謁真宗及章懿太后神御殿攝侍
中十一月辛丑拜樞密副使加食邑五百戶食實封
二百戶甲寅同修樞密院時政記十二月被差押伴

契丹賀正旦人使御筵於都亭驛

嘉祐六年辛丑公年五十五

三月戊申侍上幸後苑賞花華景亭釣魚涵曦亭遂
宴太清樓閏八月辛丑轉戶部侍郎參知政事進封
開國公加食邑五百戶食實封二百戶公辭轉官許
之九月庚申同修中書時政記十二月丙戌臘享太
廟攝太尉行事

嘉祐七年壬寅公年五十六

正月己酉朔太慶殿朝賀攝侍中承旨宣制三月乙卯祈雨南郊攝太尉行事辛酉提舉三館秘閣寫校書籍同譯經潤文四月壬午上嘉祐編勅七月庚戌差充明堂鹵簿使九月壬申文德殿奏請致齋攝侍中奏中嚴外辦己酉朝饗景靈宮庚戌朝饗太廟並攝司徒辛亥大饗明堂己未進階正奉大夫加柱國仍賜推忠佐理功臣十二月丙申上幸龍圖天章閣召輔臣至待制三司副使以上臺諫官皇子宗室駙

馬都尉管軍觀三聖御書又幸寶文閣親飛白書分
賜羣臣公得雙幅大書歲字下有御押加以御寶王
珪夾題八字云嘉祐御札賜歐陽修仍於絹尾書翰
林學士臣王珪奉聖旨題賜名又出御製觀書詩一
首令羣臣屬和遂宴羣玉殿庚子再召近臣及三館
臣僚赴天章閣觀三朝瑞物太宗真宗御集次赴寶
文閣觀御飛白書賜公金花牋字復燕羣玉殿後數
日公以狀進詩謝

按兩宴皆有賜書而實錄及范蜀公東齋記事止
載丙申有賜當時王政公親奉詔為序亦不及庚
子再賜而實錄及序又不及館職預名惟東齋記
事言之公記陸子履家藏飛白字明言羣玉殿所
賜時子履任集賢校理與東齋記事合但不知是
日公得何字其為金花牋則無疑然陳無己六一
堂圖書詩乃云黃絹兩大字又何也韓忠獻公謝
詩云鸞拂宮絹舞胡文恭公亦有謝御飛白扇子

詩得非預坐者衆所賜或不同耶實錄二十三日
丙申二十七日庚子而政公序乃作戊申壬子不
應差誤如此殆傳寫訛耳

是月差押伴契丹賀正旦人使御筵於都亭驛

嘉祐八年癸卯公年五十七

二月乙亥奉勅充沈貴妃冊禮使

不及行禮

四月壬申英

宗即位甲戌奉勅書大行皇帝哀冊謚寶甲申覃恩
轉戶部侍郎進階金紫光祿大夫加食邑五百戶食

實封二百戶仍賜推忠協謀佐理功臣乙酉奉勅篆
受命寶其文曰皇帝恭膺天命之寶五月戊辰為皇
帝祈福於南郊攝太尉行事七月戊申押伴契丹祭
弔人使御筵於都亭驛八月癸巳奉勅篆大行皇帝
謚寶其文曰神文聖武明孝皇帝之寶十月乙酉增
修太廟成命告七室十二月庚午押伴契丹賀正日
人使御筵於都亭驛

英宗治平元年甲辰公年五十八

四月甲午奉勅祈雨社稷閏五月戊辰特轉吏部侍郎八月辛丑奉勅祈晴太社十二月壬子差押伴契丹賀正旦人使御筵於都亭驛

治平二年乙巳公年五十九

是春上表乞外不允四月辛丑景靈宮奉安仁宗御容車駕行酌獻之禮攝侍中八月以大雨水再乞避位不允九月辛酉提舉編纂太常禮書百卷成詔名太常因革禮賜銀絹十一月庚午車駕朝饗景靈宮

辛未饗太廟壬申祀南郊攝司空行事進階光祿大夫加上柱國食邑五百戶

治平三年丙午公年六十

三月三日賜上巳宴時初頒明天曆適值丁巳是月以言者指濮議為邪說力求去不允七月癸酉薦饗太廟攝太尉行事十二月癸未奉勅篆皇帝尊號寶其文曰體乾膺曆文武廣孝皇帝之寶乙巳押伴契丹賀正旦人使御筵於都亭驛

治平四年丁未公年六十一

正月丁巳神宗即位戊辰覃恩轉尚書左丞進階特
進加食邑五百戶食實封二百戶仍賜推忠協謀同
德佐理功臣二月第三子棐登進士第是月御史彭
思永將之竒以飛語汙公上察其誣斥之公力求去
三月壬申除觀文殿學士轉刑部尚書知亳州改賜
推誠保德崇仁翊戴功臣閏三月辛巳宣發書駐泊
公事陞辭乞便道過潁少留許之五月甲辰至亳州

月戊申視事

神宗熙寧元年戊申公年六十二

是歲連上表乞致仕不允八月乙巳轉兵部尚書改
知青州充京東東路安撫使九月丙申至青十一月
丁亥郊祀恩加食邑五百戶食實封二百戶是歲築
第於潁

熙寧二年己酉公年六十三

三月內侍王延慶便道傳宣撫問仍賜香藥一銀合

又遞賜新校定前漢書以公嘗預刊定也冬乞壽州
便私記不允

熙寧三年庚戌公年六十四

四月壬申除檢校太保宣徽南院使判太原府河東
路經略安撫監牧使兼并代澤路麟府嵐石路兵馬
都總管公堅辭不受七月辛卯改知蔡州九月甲寅
至蔡是歲更號六一居士

熙寧四年辛亥公年六十五

公在蔡累章告老六月甲子以觀文殿學士太子少師致仕七月歸潁八月將祀明堂詔赴闕陪位公上章乞免從之禮成賜衣帶器幣牲餼

熙寧五年壬子公年六十六

閏七月庚午公薨八月丁亥贈太子太師

熙寧七年八月謚文忠

謚議見附錄

熙寧八年九月乙酉葬開封府新鄭縣旌賢鄉

元豐三年十二月以子升朝遇大禮贈太尉

元豐八年十一月贈太師追封康國公

紹聖三年五月追封兗國公

崇寧三年追封秦國公政和三年追封楚國公

皆以子
斐遇郊

恩

文忠集年譜

欽定四庫全書

文忠集卷一

宋 歐陽修 撰

居士集一

古詩三十八首

顏跖

顏回飲瓢水陋巷卧曲肱盜跖厭人肝九州恣橫行回
仁而短命跖壽死免兵愚夫仰天呼禍福豈足憑跖身

一腐鼠死朽化無形萬世尚遭戮筆誅甚刀刑思其生
所得豺犬飽臭腥顏子聖人徒生知自誠明惟其生之
樂豈減跖所榮死也至今在光輝一作輝光如日星譬如埋
金玉不耗精與英生死得失間較量誰重輕善惡理如
此毋尤天不平

猛虎

猛虎白日行心閒貌揚揚當路擇人肉熊一作熊豬不形
相頭垂尾不掉百獸自然降暗禍發所忽有機埋路傍

徐行自踏之機翻矢穿腸怒吼震林丘瓦落兒墮床已

死不敢近目睛射餘光虎勇

一作猛

恃其外爪牙利鉤鋸

人形雖羸弱智巧

一作巧智

乃中藏恃外可摧折藏中難測

量英心多決烈自信不猜防老狐足姦計安居

一作身安

穴

垣墻窮冬聽冰渡思慮豈不長引身入扱中將死猶跳
踉狐姦固堪笑虎猛誠可傷

仙草

世說有仙草得之能隱身仙書已怪妄此事况無文嗟

爾得從誰不辨偽與真持行入都市自謂術通神白日
攫黃金磊落揀竒珍旁人掩口笑縱汝暫懽忻汝方矜
所得謂世盡盲昏非人不見汝乃汝不見人

遊龍門分題十五首

上山

躡蹻上高山探險慕幽賞初驚澗芳早忽望巖扉敞林
窮路已迷但逐樵歌響

下山

行歌翠微裏共下山前路千峯返照外一鳥投巖去渡
口晚無人繫舸芳洲樹

石樓

高灘復下灘風急刺舟難不及樓中客徘徊川上山

一作

山上看一
作山上山

夕陽洲渚遠唯見白鷗翻

上方閣

聞鐘渡

一作動

寒水共步尋雲嶂還隨孤鳥下却望層林

上清梵遠猶聞日暮空

一作千

山響

伊川泛舟

春谿漸生溜演漾迴舟小沙禽獨避人飛去青林杪

宿廣化寺

橫槎渡深澗披露採香薇樵歌雜梵響共向松林歸日
落寒山慘浮雲隨客衣

自菩提步月歸廣化寺

春巖瀑泉響夜久山已寂明月淨松林千峰同一色

八節灘

亂石瀉溪流跳波濺如雪往來川上人
一作寒川上朝暮愁
灘闊更待浮雲散孤舟弄明月

白傅墳

芳荃奠蘭酌共弔松林裏溪口望山椒但見浮雲起

晚登菩提上方

野色混晴嵐蒼茫辨烟樹行人下山道猶向都門去

山槎

古木卧山腰危根老盤石山中苔霜霰歲久無春色不

如崑下桂開花獨留客

石笋

巨石何亭亭孤生此巖側
白雲與翠霧誰見琅玕色
惟應山鳥飛百轉時來息

鴛鴦

畫舫

一作船

鳴兩槳日暮芳洲路
泛泛風波鳥雙雙弄紋

羽愛之欲移舟漸近還飛去

魚

一作漁

罾

春水弄春沙蕩漾流不極
筇箸苦難滿終日沙頭客
向暮卷空罾棹歌菱浦北

魚鷹

日色弄晴

一作清

川時時錦鱗躍輕飛若下鞬
豈畏風灘

惡人歸晚渚靜獨傍漁舟落

伊川獨遊

東郊漸微綠驅馬忻獨往
梅繁野渡晴泉落春山響
身閒愛物外趣遠諧心賞
歸路逐樵歌落日寒川上

三遊洞

一本作夷陵九詠一三遊洞二下牢溪三
蝦碁碁四勞亭驛五龍溪六黃溪夜泊七

黃牛峽祠八松門九下牢津居
士集本古律各從其類今從之

漾檝沂清川捨舟緣翠嶺探竒冒層嶮因以窮人境弄

舟一作終日愛雲山徒見青蒼杳靄間誰知一室烟霞

裏乳竇雲腴凝石髓蒼崖一徑橫查渡翠壁千尋當戶

起昔人心賞為誰留人去山阿跡更幽青蘿綠桂何岑

寂山鳥嘒嘒不驚客松鳴澗底自生風月出林間來照

席仙境難尋復易迷山回路轉幾人知惟應洞口春花

落流出巖前百丈谿

即下牢
谿也

下牢溪

隔谷間溪聲尋溪度橫嶺清流涵白石靜見千峯影巖
花無時歇翠柏鬱何整安能戀潺湲俯仰弄雲景

蝦蟆碚

今土人寫作
背字音佩

石溜吐陰崖泉聲滿空谷能邀弄泉客繫舸留巖腹陰
精分月窟水味標茶錄共約試春芽槍旗幾時綠

黃牛峽

一本無祠
峽字

大川雖有神

一作固
神靈

淫祀亦其

一作本風

俗石馬繫祠門山

鷓噪叢木潭潭村鼓隔溪聞楚巫歌舞送迎神畫船百

丈山前路上灘下峽長來去江水東流不暫停黃牛千

古長如故峽山侵天起青嶂崖崩路絕無由上黃牛不

下江頭飲行人惟向舟中望朝朝暮暮

一作行
行終日

見黃牛

徒使行

一作誰
使人

人過此愁山高更遠望猶見不是黃牛

一作
灘中滯客舟

語曰朝見黃牛暮見黃牛一朝一暮
黃牛如故言江惡難行久不能過也

千葉紅梨花

峽州署中舊有此花前無賞者知
郡朱郎中始加欄檻命座客賦之

紅梨千葉愛者誰白髮郎官心好奇徘徊繞樹不忍折
一日千匝看無時夷陵寂寞千山裏地遠氣偏時節異
愁煙若霧少芳菲野卉蠻花鬪紅紫可憐此樹生此處
高枝絕一作紅艷無人顧春風吹落復吹開山鳥飛來自
飛去根盤樹老幾經春真賞今纔遇使君風輕絳雪罇
前舞日暖繁香露下聞從來奇物產天涯安得移根植
帝家猶勝張騫為漢使辛勤西域徙榴花

金雞五言十四韻

蠻荆鮮人秀厥美為物怪禽鳥得之多山雞稟其粹衆
綵爛成文真色不可繪仙衣霓紛披女錦花綵繚輝華
日光亂眩轉目睛億高田啄秋粟下澗飲寒瀨清唳或
相呼舞影還自愛豈知文章累遂使網羅掛及禍誠有
媒求友反遭賣有身乃吾患斷尾亦前戒不羣世所驚
甚美衆之害稻梁雖云厚樊紮豈為泰山林歸無期羽
翮日已鍛用晦有前言書之可為誠

和丁寶臣遊甘泉寺

寺在臨江一山上與縣廨相對

江上孤峰蔽綠蘿，縣樓終日對嵯峨。叢林已廢姜祠在。

事迹難尋楚語訛。

寺有清泉一泓，俗傳為姜詩泉，亦有姜詩祠。按詩廣漢人疑泉不在此。

空餘一派寒巖側，澄碧泓渟涵玉色。野僧宜解惜清泉。

蠻俗那知為勝迹，西陵老

一作縣

令好尋幽。時共登臨向

此遊，歎危一逕穿林樾。盤石蒼苔留客歇。山深雲日變

陰晴，澗柏巖松度歲青。谷裏花開知地暖，林間鳥語作

春聲。依依渡口夕陽時，却望層巒在翠微。城頭暮鼓休

催客，更待橫江

一作孤舟

弄月歸。

送京西提點刑獄張駕部

太華之松千歲青嘗聞其下多茯苓地靈山秀草木異
往往變化為人形神仙不欲世人採覆以雲氣常冥冥

臺郎何年

一作處

得真訣服餌既久毛骨清汝陽昔見今

十載丹顏益少方瞳明郡齋政成罇俎樂高談日接無
俗情詔書忽下褒美績使車朝出行屬城職清事簡稱

雅

一作高

意蠹書古篋

一作靈

晨裝輕洛陽花色笑春日

錦衣晝歸問里驚自云就欲

一作欲就

謝官去烏紗白髮西

臺卿他年我

一作終

亦老嵩少願乞仙粒分餘馨

贈杜默

一本注云默師太學先生石守道介

南山有鳴鳳其音和且清鳴於有道國出則天下平杜
默東土秀能吟鳳凰聲作詩幾百篇長歌仍短行攜之
入京邑欲使衆耳驚來時上師堂再拜辭先生先生領
首遣教以勿驕矜贈之三豪篇而我濫一名杜子來訪
我欲求相和鳴顧我文字卑未足當豪英豈如子之辭
鏗鏗間鏞笙淫哇俗所樂百鳥徒一作方嚶嚶杜子卷舌

去歸衫翩以輕京東聚羣盜河北點新兵飢荒與愁苦
道路日以盈子盍引其吭發聲通下情上聞天子聰次
使宰相聽何必九苞禽始能瑞一作鳴堯庭子詩何時作
我耳久已傾願以白玉琴寫之朱絲繩

送呂夏卿

夏卿父造字公初有名進士也一本云送呂先輩赴端州高要尉

昔吾尚幼學弄筆羣兒爭誦公初文嗟我今年已白髮
公初相見猶埃塵傳家尚喜有二子始知靈珠出淮濱
一作海嶼去年來書來上國欲以文字驚衆人驚駘羣
一作淮嶼

馬斂足避天衢讓路

一作騰踏

先駢駢尚書禮部奏高第斂

衣襍硯趨嚴宸曠曠春日轉黃傘藹藹賦筆摘青雲我

時寓直殿廬外衆中迎子笑以忻明朝

一作晨

失意落人

後我為沮氣羞出門得官高要幾千里猶幸海遠

一作速海

無惡氛英英帝圃多鸞凰

一作鳳

上下羽翼何續紛期子

當呼丹山鳳為瑞相與來及羣

憶山示聖俞

吾思夷陵山山亂不可究東城一堠餘高下漸岡阜羣

峯迤邐接四顧無前後憶嘗祇吏役鉅細悉經觀是時
秋卉紅嶺谷堆纈繡林枯松鱗皴山老石脊瘦斷徑履
頽崖孤泉聽清溜深行得平川古俗見耕耨澗荒驚麇
奔日出飛雉雉盤石屢敬眠綠巖堪解綬幽尋嘆獨往
清興思誰侑其西乃三峽嶮怪愈竒富江如自天傾一作

瀉岸立兩崖鬪黔巫望西屬越嶺通南奏時時懸樓對

雲霧昏白晝荒烟下牢戍百仞寒溪漱蝦蟆暮噴水簾甘
液勝飲酎亦嘗到黃牛泊舟聽猿狖巉巉起絕壁蒼翠

非刻鏤陰崑下攢叢岫穴忽空透遙岑孤聳出可愛欣
欲就惟思得君詩古健寫奇秀今來會京師車馬逐塵
簪頽冠各白髮舉酒無猜袖繁華不可慕幽賞亦難遘
徒為憶山吟耳熱助嘲詬

送唐生

一本作送唐
秀才歸永州

京師英豪域車馬日紛紛唐生萬里客一影隨一身出
無車與馬但踏車馬塵日食不自飽讀書依主人夜夜
客枕夢一作冷北風吹孤雲翩然動歸思旦夕來叩一作我

門終年少人識逆旅

一作旅意

惟我親來學媿道瞞

一作昧

贈

歸慚

一作嗟

橐貧勉之期不止多獲由力耘指家大嶺北

重湖浩無垠飛鴈不可到書來安得

一作能

頻

送任處士歸太原

時天兵方討趙元昊

一虜動邊陲用兵三十萬天威豈不嚴賊首猶未獻自

古王者師有征而不

一作無

戰勝敗繫人謀得失由廟筭

是以天子明咨詢務周徧直欲採奇謀不為人品限公

車百千輩下不遺僕賤况於儒學者廷納宜無間如何

任生來三月不得見方茲急士時論擇豈宜慢任生居

太原白首勤著撰閉戶不求聞忽來誰所薦人賢固當

用舉繆不加譴

一作賢固當用舉繆亦不加譴

賞罰兩無文是非奚以

辨遂令拂衣歸安使來者勸

一本有其餘苟盡然所責胡由辨兩句

嗟吾

筆與舌非職不敢諫

聖俞會飲

時聖俞赴湖州一本作送梅堯臣赴湖州

傾壺豈徒彊君飲解帶且欲留君談洛陽舊友一時散

十年會合無二三京師旱久塵土熱忽值晚雨涼纖纖

一作

滑公井泉釀最美赤泥印酒新開緘更吟君句勝

啖角杏花妍媚春酣酣

君詩有春風酣
杏正妍之句

吾交豪俊天下

選誰

一作
難

得衆美如君兼

一本有鏗鏘文律金玉寫
森羅武庫及戟鉅兩句

詩

工鑱刻露天骨將論縱橫輕玉鈴遺編最愛孫武說往

往曹杜遭夷芟關西幕府

一作
下

不能辟隴山

一作
西

敗一作

大將死可慚嗟余身賤不敢薦四十白髮猶青衫吳興

太守詩亦好往

一作
助

奏玉瑄和英咸盃行到手莫辭醉

明日

一作
發

舉棹天東南

送胡學士知湖州

一本云送胡宿武平學士

武平天下才四十滯鉛槧忽乘使君舟歸榜

一作

不可

纜都門春漸動柳色綠將暗掛帆千里風水闊江濫濫

吳興水精宮樓閣在寒鑑橘柚秋包繁烏程春瓮醞清

談越客醉屢舞吳娘艷寄詩毋憚頻

一作

以慰離居念

哭

一作
弔石曼卿

嗟我識君晚君時猶壯夫信哉天下奇落落不可拘軒

昂懼驚俗自

一作

隱酒之徒一飲不計斗傾河竭崑墟

作詩幾百篇錦組聯瓊琚時時出險語意外研精麤窮
竒變雲烟搜怪蟠蛟魚詩成多自寫筆法顏與虞旋棄

不復惜所存今幾餘往往落人間藏之比明珠又好一作

愛題屋壁虹霓隨卷舒遺蹤處處在餘墨潤不枯胸山

頃歲出我亦斥江湖乖離一作四五載人事忽焉一作

殊歸來見京師心老貌已癯但驚何其衰豈意今也無

才高不少下閤若與世踈驂騑當少時其志萬里塗一

旦老伏櫪猶思玉山芻天兵宿西地狂兒尚稽誅而今

壯士死痛惜無墮愚歸魂渦上田露草荒春蕪

送曇穎歸廬山

吾聞廬山久欲往世俗拘昔歲貶夷陵扁舟下江湖八
月到湓口停帆望香爐香爐雲霧間杳靄疑有無忽值
秋日明彩翠浮空虛信哉竒且秀不與瀟霍俱偶病不
得往中流但踟躕今思尚髣髴恨不傳畫圖曇穎十年
舊風塵客京都一旦不辭訣飄然卷衣一作長裾山林往
不返古亦有吾儒西北苦兵戰江南仍旱枯新秦又攻

寇京陝募兵夫聖君念蒼生賢相思良謨嗟我無一說
朝紳拖舒舒未能膏鼎鑊又不老菰蒲羨子識所止雙
林歸結廬

送孔秀才遊河北

吾始未識子但聞楊公賢及子來叩門手持贈子篇賢
愚視所與不待交子一作得言子文諧律吕子行潔琅
玕行矣慎所遊惡草能敗蘭

送黎生下第還蜀

黍離不復雅孔子修春秋扶王貶吳楚大法加諸侯妄
儒泥於魯甚者云黜周大旨既已矣安能討一作源流

遂令學者迷異說相交鉤黎生西南秀挾策來東遊一作

州有司不見採春霜滑歸輶自云喜三傳力一作方欲探

微幽凡學患不彊苟至將焉度聖言簡且直慎勿迂
其求經通道自明下筆如戈矛一敗不足卹後功掩前
羞

文忠集卷一

欽定四庫全書

文忠集卷二

宋 歐陽修 撰

居士集二

古詩二十首

送楊闢秀才

吾竒曾生者始得之太學初謂獨軒然百鳥而一鷄既
又得揚生羣獸出麟角乃知天下才所識慚未博揚生

初誰師仁義而禮樂天姿撲且茂美不待追琢始來讀

其文如渴飲醴

一作
澶

酪既坐即之談稍稍吐鋒鏑非唯

富春秋固已厚天爵有司選羣材繩墨困量度胡為謹

毫分而使遺磊落至寶異常珍夜光驚把握駭者弃諸

塗竊拾充吾橐其於獲二生厥價玉一穀嗟吾雖得之

氣力獨何弱帝閣啓巖巖

一作
巖巖

欲獻前復却遽令扁舟

下飄若吹霜籜世好競辛鹹古味殊淡泊

一作
薄

否泰理

有時惟窮見其確

送孔生

一本生
作監簿

再遊河北

志士惜白日高車無停輪孔生東魯儒年少勇且仁大
軸獻理匭長裾弊街塵門無黃金聘家有白髮親寒風
八九月北渡大河津玉塞積精甲金戈躍秋雲孔生力
數斗其智兼千人短褐不自暖高談吐陽春北州多賢
侯待一作士誰最勤一見贈雙壁再見延上賓丈夫患
不遇豈患長賤貧

送慧勤歸餘杭

越俗僭宮室，傾貲事雕牆。佛屋尤其侈，耽耽擬侯王。文彩瑩丹漆，四壁金焜煌。上懸百寶蓋，宴坐以方牀。胡為

弃不居，棲身客京坊。辛勤營一室，有

一作乃

類鷲巢梁。南

方精飲食，菌

一作菌

笋鄙羔羊飯。以玉粒粳調之，甘露漿

一饌費千金，百品羅成行。晨興未飯僧，日昃不敢嘗。乃

茲隨北客，枯粟充飢腸。東南地秀絕，山水澄清。

一作鮮光

餘杭幾萬家，日夕焚清香。烟霏四面起，雲霧雜芬芳。豈

如車馬塵，鬢髮染成霜。三者孰苦樂，子奚

一作分

勤四方

乃云慕仁義奔走不自違始知仁義力可以治膏肓有

志誠可樂

一作嘉

及時宜自彊人情重懷土飛鳥思故鄉

夜枕聞北鴈歸心逐南檣歸兮能來否送子以短章

讀張李二生文贈

一本作謝張續李常寄

石先生

先生石介也

先生二十年東魯能使魯人皆好學其間張續與李常

剖琢珉石

一作如剖珉石一作如剖衆石

得天璞大圭雖不假雕琢

一作

錫但未磨礪出圭角二生固是天下寶豈與先生私楮

橐先生示我何矜誇手携文編謂新作得之數日未暇

讀意欲百事先

一作前

屏却夜歸獨坐南窓下寒燭青熒

如熠燿病眸昏澁乍開緘燦若月

一作日

星明錯落辭嚴

意正質非俚

一作高且簡

古味雖淡醇不薄千年佛老

一作苦佛

賊中國禍福依憑羣黨惡拔根掘窟期必盡有勇無前

力何犖乃知二子果可用非獨詞

一作特言

堅由志確朝廷

清明天子聖陽德暈進羣陰剥大意養賢有列

一作味別

豈久師門共藜藿

一作有先生在魯魯皆化苟用於朝其判博兩句又一本在作居朝作時

予

一作我

慚職諫未能薦有酒且慰先生酌

絳守居園池

嘗聞紹述絳守居偶來覽登

一作登覽

周四隅異哉樊子恠

可吁心欲獨出無古初窮荒搜幽入有無

一作無有

一語詰

曲百盤紆孰云已出不剽襲句斷欲學盤庚書

一本有方言爾

雅不訓詰幾欲舌
譯從象胥兩句

荒烟古木蔚遺墟我來嗟祇

一作止得

其餘柏槐端莊偉丈夫蒼顏鬱鬱老不枯靚容新麗

一何姝清池翠蓋擁紅蕖胡髯虎搏豈足道記錄細碎

何區區虞氏八卦畫河圖禹湯皋虺

一作陶

暨唐虞豈不

古與萬世摸嫉世狡巧

一作好

習卑汙以竒矯薄駭羣思

用此猶得追韓徒我思其人為躊躇作詩聊詭為坐娛

晉祠

一本作過并州晉祠泉

古

一作故

城南出十里間鳴渠夾路

一作石渠夾道

何潺潺行人

望祠下馬謁退即祠下窺水源地靈草木得餘潤鬱鬱

古

一作松

柏含蒼烟并兒自古事

一作重

豪俠戰爭五代幾

百年天開地闢真主出猶須再駕方凱旋頑民盡遷高

壘削秋草自綠埋空垣

一作自綠空塞垣

并人昔遊晉水上清

鏡照耀涵朱顏晉水今入并州裏稻花漠漠澆平田廢

興髻髻無舊

一作故

老氣象寂寞餘山川惟存祖宗聖功

業干戈象舞被管絃我來覽登

一作登覽

為歎息暫照白髮

臨清泉鳥啼人去廟門闔還有山月來娟娟

登絳州富公嵩巫亭示同行者

羣峯擁軒楹竹樹陰漠漠公胡苦思山規構自心作惟予

一作予亦

愛山者初仕即京洛嵩峯三十六終日對高閣陰

晴無朝暮紫氣常浮泊雄然九州中氣象壓寥廓亦

嘗步其巔培塿視

一作觀

四岳其後窺荆蠻始識峽山

惡長江瀉天來巨石忽開拓始疑茫昧初渾沌死鑄鑿

神功夜催就萬仞成

一作或

一削尤竒十二峯隱見入冥

邈人蹤斷攀緣異物宜所託顧瞻但徘徊想像逢綽約

嵩山近可愛泉石吾已諾終朝友幽人白首老雲壑荆

巫惜遐荒詭怪杳難度至今清夜思魂夢輒飛愕偶來

玩茲亭塵眼刮昏膜况逢秋雨霽濃翠新染濯峯端

上明月且可留幽酌

水谷夜行寄子美聖俞

一本題上有補成字

寒

一作晨

雞號荒林山壁月倒掛披衣起視夜攬轡念行

一作邀

邁我來夏云初素節今已屆高河瀉長空勢落九

州外微風動涼襟曉氣清餘睡

一作色清餘暇

緬懷京師友文

一作有

酒邈

一作邀

高會具間燕與梅二子可畏愛篇章富

縱橫聲價相磨

一作摩

蓋子美氣尤雄萬竅號一噫有時

肆顛狂醉墨洒霧霈壁

一作勢

如千里馬

一作足

已發不可

殺盈前盡珠璣一一難東汰梅翁事清切石齒漱寒瀨

作詩三十年視我猶後

一作後猶無

輩文詞愈清新心意雖

一作難

老大譬如妖韶女老自有餘態近詩尤古硬

一作淡

咀嚼苦難噉初如食橄欖真味久愈在蘇豪以氣轢一作

礫

舉世徒

一作盡

驚駭梅窮獨我知

一作我獨奇

古貨今難賣

一作物今誰買

二子雙鳳凰百鳥之嘉瑞雲烟一翱翔羽翮一

摧鍛安得相從遊終日嗚噦噦問胡

一作相問

苦思之對酒

把

一作把酒對

新蟹

病中代書奉寄聖俞二十五兄

一本無奉字及下四字

憶君去年來自越，值我傳車催去闕。是時新秋蟹正肥。

恨不一醉與君別，今年得疾

一作別病

因酒作一春不飲氣

彌劣飢腸未慣飽，甘脆

一作平生作得飽甘肥

九蟲寸白

一作腹蟲不慣

爭為孽一飽，猶能致身患。寵祿豈無神所罰，乃知賦子

分有涯。適分自然無天閼，昔在洛陽年少時。春思每先

花亂發，萌芽不待揚。柳動探春馬蹄常踏雪，到今年纔

三十九。怕見新花羞白髮，顏頰侵塞下風霜色。病過鎮陽

桃李，月兵閒事簡。居可樂，心意自衰非屑屑。日長天暖

惟欲睡

一作眠

睡美尤厭春鳩聒北潭去城無百步淥水

冰銷魚撥刺經時曾未著脚到好景但聽遊人說官

榮雖厚世味薄始信衣纓乃羈紲故人有幾獨思君

安得見君憂暫豁公厨酒美遠莫致念君貫

一作慣

飲

衣屢脫郭生書來猶未到想見新詩甚飢渴少年事

事今已去惟有愛詩心未歇君閒可能為我作莫辭

自書藤紙滑少低筆力容我和無使難追韻高絕

鎮陽殘杏

一本有寄
聖俞字

鎮陽二月春苦寒東風力弱冰雪頑北潭跬步病不到

卽常山宮後池也
州之勝游惟此

何暇騎馬尋郊原鵬一作丘新晴暖

已動砌下流水來潺潺

鵬丘水在州西十五
里以長渠引走城中

但聞簷間

鳥語變不覺桃杏開已闌人生一世浪自苦盛衰桃杏

開落間西亭昨日偶獨到

一作
往

猶有一樹當南軒殘芳

爛漫看更好皓若春雪圍枝繁無風已恐自零落長

條可愛不可攀猶堪携酒醉其下誰肯伴我顏巾冠

班班林間鳩寄內

班班林間鳩穀穀命其匹迨天之未雨與汝勿相失春

原洗新霽綠葉暗朝日鳴聲相呼一作呼應荅如吹

相諧

一作若律深棲柔柔暖下啄高田實人皆笑汝拙無巢

呂應嘉

以家室易安由寡求吾羨拙之佚吾雖有室家出處曾

不一一本有豈如鳴鳩樂天性免垂涕兩句荆蠻昔竄逐奔走若鞭扶山

川瘴霧深江海波濤颶跬步子所同淪棄甘共沒投身

去人眼已廢誰復嫉山花與野草我醉子鳴瑟但知貧

賤安不覺歲月忽還朝今幾年官祿霑兒姪身縈責愈

重器小憂常溢今年來鎮陽留滯見春物北潭新漲淥

魚鳥相聳聒

魚乙切一作懼聲逸

我意不在春所憂空自咄一官

誠易了報國何時畢高堂母老矣衰髮不滿櫛昨日寄

書言新陽發舊疾藥食

一作石

子雖勤豈若我在膝又云

子亦病蓬首不加髻書來本慰我使我煩憂鬱思家春

夢亂妄意占凶吉却思夷陵囚其樂何可述前年辭諫

署朝議不容乞孤思一許國家事豈復

一作暇

血橫身當

衆怒見者旁可慄近日讀除書朝廷更輔弼君恩優天

臣進退禮有秩小人妄希旨論議爭操筆又聞說朋黨次第推甲乙而我豈敢逃不若先自劾上賴天子聖必

未一作未必加斧鑕一身但得貶羣口息嗾啣公朝賢彥衆

避路一本作讓當揣質苟能因謫去引分思藏密還爾禽鳥

性樊籠免驚怵子意其謂何吾謀今已必一本有誠思憂與樂便可

齊升熟子能一作如甘藜藿我易解簪紱嵩峯三十六蒼

翠爭聳出安得携子去耕桑老蓬華

暮春有感

幽憂無以銷春日靜愈長薰風入花骨花枝午低昂往
來採花蜂清蜜未滿房春事已爛漫落英漸飄揚蛺蝶
無所為飛飛助其忙啼鳥亦屢變新音巧調簧遊絲最
無事百尺拖晴光天工施造化萬物感春陽我獨不知
春久病卧空堂時節去莫挽浩歌自成傷

洛陽牡丹圖

洛陽地脉花最宜牡丹尤為天下奇我昔所記數十種
於今十年半忘之開圖若見故人面其間數種昔未窺

客言

一作云

近歲花特異往往變出呈新枝洛人驚誇立

名字買種不復論家貲比新較舊難

一作莫

優劣爭先

擅價各一時當時絕品可數者魏紅窈窕姚黃妃壽

安細葉開尚少

一作早

朱砂玉版人

一作猶

未知傳聞千

葉昔未有只從左紫名初馳四十年間花百變最後最

好潛溪緋今花雖新我未識未信與舊誰妍媸當時

一作年

所見已云絕宜有更好

一作妍

此可疑古稱天下

無正色但恐世好隨時移鞞紅鶴翎豈不美斂色如

避新來姬何況遠說蘇與賀有類異世誇牆施造化
無情宜一槩偏此著意何其私又疑人心愈巧偽天一作
各欲鬪巧窮精微不然元化朴散久豈特近歲尤澆漓
爭新一作先鬪麗若不已更後百載知何為但應新花日
愈好惟有我老年年衰

鎮陽讀書

春深夜苦短燈冷焰不長塵蠹文字細病眸澁無光坐
久百骸倦中遭羣慮戕尋前顧後失得一念一作而十

忘乃知學在少老大不可彊廢書誰與語歎息自悲傷

因憶石夫子徂徠有茅堂前年來京師講學居上庠青

衫綴朝士而有

一作
乃弃

數畝桑不耐羣兒嗤束書歸故鄉却

尋茅堂在高卧泰山傍聖經曰陳前弟子羅兩廂大論

叱佛老高聲

一作
言

誦虞唐賓朋足棗栗兒女飽糟糠雖

云待官闕便欲解朝裳有似蠶作繭縮身思自藏嗟

我一何愚貪得不自量平生事筆硯自可娛文章開

口攬時事論議爭煌煌退之嘗有云名聲暫羶香誤

蒙天子知侍從列班行官榮日已寵事業閭不彰器小以一作

而任大躋顛理之常聖君雖不誅在汝一作兩一作豈自違不能

雖欲止怳

一作恍

若失其方却欲尋舊學舊學已榛荒有

類邯鄲步兩失皆茫茫便欲乞身去君恩厚須償又欲
求一州俸錢買歸裝譬如歸巢鳥將棲少徊翔自覺誠
未晚收愚老縲紲

留題鎮陽潭園

官雖鎮陽居身是鎮陽客北園潭上花安問誰所植春

風無先後爛漫爭紅白一花聊一醉盡醉猶須百而我
病不飲對花空歎息朝來不能歸暮看不忍摘謂言花
縱落滿地猶可席不來纔幾時人事已非昔芳枝結青杏
翠葉新奕奕落絮風卷盡春歸不留迹空餘綠潭水尚
帶餘春色疑一作思春竟何之意謂追可得東西遶潭行
蜂鳥已寂寂惘然無所依歸駕不停輒寓興誠可樂留
情豈非惑至今清夜夢猶遶北潭北

讀一本有蟠桃詩寄子美

聖俞字

韓孟於文詞兩雄力相當

一本有偶以恠自戲
作詩驚有唐兩句

篇章綴

談笑雷電擊幽荒衆鳥誰

一作不

敢和鳴鳳呼其凰孟窮

苦累累韓富浩穰穰窮者啄其精富者爛文章發生一

為宮擘斂一為商二律雖不同合奏乃鏘鏘天之產奇

恠希世不可常寂寥二百年至寶埋無光郊死不為鳥

聖俞發其藏患世愈不出孤吟夜號

一作夜
號清

霜霜寒入

毛骨清響哀

一作乃

愈長玉山未難熟終歲苦飢腸我不

能飽之更欲不自量引吭和其音力盡猶勉彊

一本有
嗟我於

韓徒足未及其牆而子得

孟骨英靈空比印四句 誠知非所敵但欲繼前芳近

者蟠桃詩有傳來北方發我衰病思藹如得春陽忻然

便欲和洗硯坐中堂墨筆不能下怳怳一作恍恍若有亡老

雞觜爪硬未易犯其場不戰先一作輒自知雖奔一作然未

甘降更一作便欲呼子美子美隔濤江其人雖憔悴其志

獨軒一作昂昂氣力誠當對勝敗可交相安得二子接揮

鋒兩交銑我亦願助勇鼓旗謀其旁快哉天下樂一酬

宜百觴垂離難會合此志何由償

初伏日招王幾道小飲

北園數畝官墻下，嗟我官居如傳舍。潯沲北渡馬踏

一作

蹄，冰西山病歸花已謝。落英不見空繞樹，細草初長猶

可藉。空園一鎖不復窺，不覺芳蹊繁。早夏隔墻時時聞

好鳥如得嘉

一作佳

客聽清話，今朝試去繞園尋綠李。橫

枝礙行馬，蒲萄憶見初引蔓。翠葉陰

一作成

陰還滿架，紅

榴

一作榴花

最晚子已繁，猶有殘花藏葉罅。

一本有雖無桃李競繁華，固有

竹栢資瀟

酒兩向，人生有酒復何求。官事無了須偷暇，古云伏

日當早歸况今著令許休假能來解帶相就飲為子掃
月開風榭

白髮喪女師作

一本無
下四字

吾年未四十三斷哭子腸一割痛莫忍屢痛誰能當割
腸痛連心心碎骨亦傷出我心骨肉灑為清淚行淚多
血已竭毛膚冷無光自然鬢與鬢

一作鬢
與鬢

未老先蒼蒼

永陽大雪

清流關前一尺雪鳥飛不渡人行絕冰連

一作
流

谿谷麋

鹿死風勁野田桑柘折江淮旱濕殊北地歲不苦寒常
疫癘老農自言身七十曾見此雪纔三四新陽漸動愛
日輝微和習習東風吹一尺雪幾尺沉沉深麥苗春始肥
老農爾豈知帝力聽我歌此豐年詩

送章生東歸

窮山


一作廬

荒僻人罕顧子以一身千里來問子之勤何

所欲自慚報子無瓊瑰非徒多難學久廢世事漸懶由
心哀吳興先生富道德伉伉弟子皆賢材鄉閭禮讓已

成俗餘風漸被來江淮子年方少力可勉徃與夫子為

顏回



文忠集卷二